

# Powšitkowne WOZJEWJENJA

njedźelu, 18. septembra 2016

## Hudźbny nyšpor w Budyskej serbskej cyrkwi

Na kermuši cyrkwy Našeje lubeje Knjenje w Budyšinje njedźelu, 18. septembra, budže we 18.00 hodź. dwurěčny hudźbny nyšpor. Jón wuhotuja saksofonist Thomas Siegmund, Michał Donat a cyrkwinski hudźbny direktor Friedemann Böhme na piščelach. Zastup je darmotny, při cyrkwinych durjach přewjedže so zběrka.

## Finisaža a koncert w Serbskim muzeju

Wustajeńca „Pruhi, kruhi, třiróžki. Pisane serbske jutrowne jejka.“ so tutu njedźelu, 18. septembra, w Budyskim Serbskim muzeju skónči. W 15.00 hodź. budže poslednje zjawne wodženje po tutej wosebitej wustajeńcy k temje starodawnych mustrow a ornamentow w ludowym wuměłstwje a wosebje na jutrownych jejkach.

Wot 16.00 hodź. zahudža čěscy a němscy hudźbnicy na zhromadnym koncerće na žurli muzeja. Serbski muzej je jedna ze stacijow koncertowego rjada we wokolinje němsko-českeje hranicy z wobdźělenjom Turnowskeho orchestralneho zwjazka. Čěski komponist a dirigent Martin Hybler nawjeduje hudźbny projekt z wotmyslom, zo połowanscy a lajsy hudźbnicy wobeju krajow zhromadnje hudža. Program je ze staršich a nowšich kompozicijow wobeju narodow zestajeny.

## Nyšpor z požohnowanjom konjacych zapřahow

Towarstwo Cyrila a Metoda, sekcija wěda a skutk, přeprašuje tež lětsa na wosebity nyšpor domchowanki z požohnowanjom konjacych zapřahow. Tutón budže njedźelu, 25. septembra, w 14 hodź. w Chrósćicach na luce při Hatkach. Wšitcy su wutrobnje přeprašeni.

## Zhromadny dzeń za 3. a 4. lětnik

Dekanatne dušepastyrstwo přeprašuje džěci 3. a 4. lětnika sobotu, 24. septembra, wot 9 do 15 hodź. do Don Boskoweho domu we Worklecach. Zhromadny dzeń šulerjow změje heslo „Swjeć swjedzenje!“ Zajimcy njech so prošu hač do wutory, 20. septembra, pod telefonowym čisłom (03 57 96) 8 87 07 we Worklecach přizjewja. Za wudawki dnja zběra so wot kóždneho wobdźělnika přinošk, kotryž wučinja štyri eura.

## Duchowna hudźba w tachantskej cyrkwi

20. chórowy koncert Katolskeho tachantskeho chóra budže njedźelu, 25. septembra, we 18 hodź. w Budyskej tachantskej cyrkwi. Wuměłski nawod změje cyrkwinski hudźbny direktor Friedemann Böhme. Wšitcy su wutrobnje přeprašeni.

## Smochčanski forum

We wobłuku 1. Budyskeho tydženja demokratije přeprašuje Dom biskopa Bena pónđzelu, 19. septembra, w 19.30 hodź. na diskusijne zarjadowanje Smochčanskeho foruma. Zawodny přednošk k temje „Što je konkretnje móžno – demokratija, neutralnosć a kuraža w politice a zarjadnistwje“ změje dr. Hendrik Träger z Lipšćanskeje uniwersity. Mjez druhim pónđže wo prašenje, na kotrym demokratiskim zakładže so rozsudy abo přizwolenja tworja, na přikład hladajo na demonstracije prawicarskich skupin w Budyšinje.

## **Diskusija dla stracha wo okcident**

Wostanje okcident křesćanski abo hrozy strach, zo změja města w Němskej wjace minaretow hač cyrkwinych wěžow? Kak němscy měli wukrajnicy być, zo bychu w Němskej žiwi być směli? Tutymaj a dalšim prašenjam wěnujetaj so prezident Centralneho komiteja katolikow Němskeje (ZdK), profesor dr. dr. Thomas Sternberg, z Bonna a dr. Alexander Gauland z Podstupima, člon předsydstwa AfD wutoru, 27. septembra, w 19 hodź. na diskusiji, kotruž zarjadowuje Katolska akademija w Drježdžanskim Domje katedrale, Schloßstraße 24. Moderator budže Joachim Frank z Kölna, šefkorespondent medijoweje skupiny DuMont a předsyda Zwjazka katolskich publicistow Němskeje. Zajimcy měli so najpozdzišo hač do pjatka, 23. septembra, pola Katolskeje akademije přizjewić, pak pod [info@ka-dd.de](mailto:info@ka-dd.de) abo [www.facebook.com/KatholischeAkademieDresden](https://www.facebook.com/KatholischeAkademieDresden), telefonowe čisło (03 51) 4 84 47 42.

## **Oratorij „Serbski rekwiem“ zaklinči w Chróšćicach**

Duchowny oratorij „Serbski rekwiem“ z pjera Handrija Zejlerja a Korle Awgusta Kocora předstaji so njedźelu a póndźelu, 2. a 3. oktobra, we 18 hodź. w Chróšćanskej cyrkwi. Pod wumělskim nawodom mjezynarodnje skutkowaceje serbskeje dirigentki Judithy Kubicec spěwa chór Lipa z Pančic-Kukowa a hudži Komorny orchester Sinfonietta z Drježdžan. Solisća budu Daniela Hazec (sopran), Stephanie Hauptfleisch (alt), Patrik Horňák (tenor) a Johannes Hochrein (bas). Wšitcy su wutrobnje do Chróšćic přeprašeni.